

Gaji baru rangsang pertumbuhan KDNK

BH - 23/5/2007

Kerajaan cukup dana biaya kos RM8.09b setahun

PUTRAJAYA: Kenaikan gaji kakitangan awam yang diumumkan Perdana Menteri kelmarin, akan menyumbang 0.5 peratus kepada pertumbuhan ekonomi Malaysia tahun ini dan tambahan sekurang-kurangnya setengah peratus lagi pada 2008, kata Menteri Kewangan Kedua, Tan Sri Nor Mohamed Yakcop.

"Pengiraan awal kita menunjukkan untuk tahun ini saja kesannya kepada Keluaran Dalam Negara Kasar (KDNK) ialah sehingga 0.5 peratus lebih tinggi daripada kadar pertumbuhan yang dicatat sekiranya tiada kenaikan gaji. Tahun depan kadar pertumbuhan akan meningkat sekurang-kurangnya separuh peratus lagi," katanya.

Beliau bagaimanapun berkata, keadaan ini tidak semestinya bermakna ekonomi tumbuh melebihi kadar enam peratus yang dijangkakan untuk 2007.

"Kebiasaannya, kita tidak mengubah unjuran sehinggalah September," katanya.

Nor Mohamed berkata, kenaikan gaji itu memberikan kesan positif kepada ekonomi memandangkan langkah itu bukan saja memanfaatkan 1.002 juta kakitangan awam, malah lima juta lagi tanggungan mereka.

"Berdasarkan pengalaman, kakitangan awam akan membelanjakan se-

“ Kami mensasarkan untuk menurunkan bajet defisit kepada tahap mampan pada 3.4 peratus tahun ini ”

Nor Mohamed Yakcop
Menteri Kewangan Kedua

tiap ringgit yang diterima. Ini akan mendorong pertumbuhan berasaskan penggunaan dan kesan sampingan lain yang menjurus kepada lebih banyak perniagaan serta cukai yang lebih tinggi," katanya pada satu taklimat khas untuk agensi berita bagi menjelaskan kenaikan gaji kakitangan awam itu.

Meskipun kuasa membeli meningkat, inflasi dijangka kekal pada unjuran 2.5 peratus.

Beliau juga berkata, inflasi akan hanya berlaku apabila ada kekangan kapasiti dan keadaan itu tidak berlaku sekarang.

Nor Mohamed juga berkata, kerajaan tidak akan meminjam dari pasaran bagi menampung pembiayaan RM8.09 bilion perbelanjaan tambahan yang diperlukan untuk kenaikan gaji serta 100 peratus kenaikan Bantuan Sara Hidup (Cola) memandangkan kerajaan mempunyai dana yang mencukupi. - Bernama